

Setar NV ta spera habri año 2005 cu un Tele Aruba totalmente nobo

ORANJESTAD (AAN)-- Durante un entrevista exclusivo cu Susy Maduro, Relacionista Publico di Setar NV., DIARIO a puntre riba e forma con e plannan relaciona cu Telearuba ta bayendo den e dianan aki.

CAMBIONAN:

Susy Maduro a indica cu Telearuba a cuminsa muestra cambionan, pero tur e proceso ta tuma hopi trabao, den e sentido cu mester tin planificacion riba un imagen, logo, colornan nobo, jingle, di ki forma esaki lo bay wordo

presenta, entre otro. A sigui bisa cu di mesun forma, mester busca un forma inovativo di presenta e programanan y e seccionnan cu e programacion nobo lo inclui.

"Tur esaki ta tuma tempo, ta tuma creatividad. Nos tin hendenan trahando caba riba e jingle, logo, y tur esey ta bayendo pareu pa mas pronto posible, asina cu nan bin cu e presentacion, tambe nos tin e tempo pa scoge e colornan, e musica, tur e cosnan ey, den un tempo mas corto posible", Maduro a señala.

TELE-TEXTO NOBO:

Banda di esaki, a bisa cu e tempo cu TeleAruba ta tumando cu su preparativonan ta algo normal. A agrega cu aworaki, den e programacion cu e-televisora tin, a cuminsa cu un tele-texto nobo, pero sin embargo, esaki ta para cu actualmente a caba di basha e edificio. Mester warda pa e constructornan cuminsa caba e fundeshi pa asina pone e prome piedra, caminda poco poco lo bay cuminsa saca potret y pone nan ariba pantaya pa asina e hende por wak con e avancen ta bayendo.

EDIFICIO NOBO:

Susy Maduro a manifesta cu aworaki Telearuba ta bay cuminsa cu un edificio nobo, locual ta bay tuma su proceso, pero cu ta bayendo hopi mas rapido cu loke e hende ta pensa. E edificio, cual a wordo construi na año 1963 tabata hopi deteriora, caminda e hende tabata trahando den condicionnan deplorable, pesey mester a basha un parti pa hacie nobo. E parti di estudio, cual si a wordo traha nobo a keda intacto. Aworaki, lo bay parti e edificio di un otro manera di forma cu e por funciona optimalmente.

A sigui bisa cu di mesun forma e entrada di e edificio lo bay cambia y e landscaping lo bay duna un otro apariencia y un otro presentacion na e planta nacional.

PROGRAMACION:

Relaciona cu e programacion a informa cu nan ta cu programanan cu tabata tin contractnan existente, cualnan a wordo renoba y aworaki eseynan ta e programanan cu Telearuba ta pasando. E horarionan, actualmente no ta



completo, ya cu ainda no tin e programanan cu nan kier ofrece. *"Ora bo ta draai un television bo ta bay cumpra derechonnan pa pasa programanan, no ta zomaar, bo ta bay cu un antena cuminsa download programanan pa pasa. Tur e cosnan mester bay na camindanan legal, manera nan mester ta. E licencianan mester wordo pidi, etc",* e relacionista publico a laga sa.

Segun e PR di Setar NV, e programanan nobo lo mester ta algo cu no solamente ta entretene sino cu tambe ta informa y educa e publico. Esaki ta algo riba locual nan tin hopi enfasis. A señala cu por ehemplo, e produccion nacional di programanan educativo lo bay bira algo cu ta costa hopi placa, pesey, probablemente lo mester bay wak riba diferente opcion, pero tur esaki ta aworaki den proceso.

NOTICIA:

Na otro banda a recalca cu e siguiente fase cu nan ta bay ta

e parti di noticia, cual ta den proceso. Ya caba tin conversacionnan riba ki sorto di formato e noticia ta bay tuma y riba e team cu lo representa e noticiero. A subraya cu hasta por bisa cu den e dianan aki, ya caba cada bez lo bay wak cada siman un otro segmento lo bin acerca te na momento cu full e programacion bin cla.

"Nos ta sigur di Setar NV cu nos no ta para keto y cu nos ta trahando hasta den fin di siman pa bin cu un proyeccion nobo, pasobra television no ta solamente plachi, e ta movecion. Bo tin cu bin cu cosnan totalmente nobo pasobra nos no bay cay den mesun ripiticion, anto haci Telearuba mesun cos cu e tabata. E mester ta algo totalmente nobo y algo cu e hende di Aruba por goza di dje y por ta orguyoso di dje como television nacional", Maduro a recalca.

Finalmente, a declara cu nan ta spera cu pa fin di año caba cu tur e proceso di renovacion y habri año 2005 cu un Telearuba totalmente nobo.